

### **González Santín atende a petición dos veciños de Cospeito, comprometéndose a pedir no Parlamento que a Xunta non reduza o servizo do centro de saúde**

O deputado autonómico, alertado por Rosa Morán, asumiu este compromiso na reunión que mantivo con veciños deste municipio. Pedirá que o Goberno galego “dea marcha atrás” no que “semella ser un novo plan para acabar coa atención sanitaria a nivel local e provincial”

“Primeiro, a Sra. Mosquera ten a desfachatez de vir a Lugo para dicirnos que os lucenses que poidan sufrir un infarto a partires das tres da tarde non imos poder ser atendidos e, agora, tamén quere meter o bisturí nos centros de saúde. Estannos levando a unha traxedia sanitaria. Dende logo, aos socialistas vannos ter en contra”, subraia

Para Santín, a situación de Cospeito é consecuencia “da política redutora da Xunta”, plasmada tamén no anuncio de reducir facultativos nos concellos de menos de 2.000 habitantes; unha medida que, de levarse a cabo, afectaría a un total de 24 municipios, é dicir, a 32.765 habitantes. Recentemente, o PSOE tamén reclamou que se garanta a calidade sanitaria asistencial aos veciños de Riotorto e Mondoñedo

**COSPEITO, 9 DE FEBREIRO DE 2015.-** O deputado autonómico e secretario Provincial –Juan Carlos González Santín-, alertado pola voceira do grupo municipal socialista de Cospeito –Rosa Morán-, mantivo esta tarde unha reunión con veciños da localidade e que dende hai días reclaman á consellería de Sanidade que o centro de saúde retome o horario habitual, así como que o servizo non se vexa recortado nin en canto ao tempo nin en persoal. Deste xeito, e logo de escoitar aos afectados, González Santín comprometeuse publicamente a rexistrar mañá mesmo, e coincidindo coa sesión plenaria do Parlamento, unha iniciativa que irá destinada a recabar o apoio unánime da Cámara para que a Xunta de Galicia “dea marcha atrás” no que “semella ser un novo plan para acabar coa atención sanitaria a nivel local e provincial”.

“Primeiro, a Sra. Mosquera ten a desfachatez de vir a Lugo para dicirnos que os lucenses que poidan sufrir un infarto a partires das tres da tarde non imos poder ser atendidos e, agora, tamén semella que quere meter o bisturí nos centros de saúde. O que reclaman estes veciños é un dereito. Por iso, no Parlamento esixiremos responsabilidades. Este Goberno galego estanos levando a unha traxedia sanitaria. Dende logo, aos socialistas vannos ter en contra de todo o que supoña o desmantelamento do sistema polo que tanto loitamos. Así o manifestarei na iniciativa que rexistre mañá”, confirmou González Santín.

Pola súa banda, Rosa Morán, que foi a impulsora do encontro, e logo de agradecer o traballo que están a desenvolver as distintas asociacións que dende hai días veñen denunciando esta situación, agradeceulle a disposición e a colaboración ao deputado autonómico, xa que, dixo, “neste caso toda a axuda é pouca. Os socialistas non podemos deixar abandonados aos veciños e temos que estar do seu lado. Faremos todo o que estea na nosa man para evitar este ataque frontal á Sanidade, porque non podemos esquecer que detrás de todo isto están as persoas. A diferenza está en que para o PP os cidadáns son números e para nós son unha prioridade. Aos gobernos do PP só lles preocupa cadrar as contas, pero coa saúde non se xoga”. E é que, tal e como subliñou, “nó só estamos afectados os de Muimenta, pois, no caso de que o médico se

poña enfermo, ten que vir ata aquí o de Feira do Monte, é dicir, que os dous centros están mal cubertos”, insistiu.

### **Máis respostas do socialistas**

A demanda dos veciños de Cospeito non é a única petición que atende o secretario Provincial nesta materia. Recentemente, os socialistas tamén reclamaron na Cámara galega á Xunta que garanta “a calidade sanitaria asistencial” aos veciños de Riotorto e Mondoñedo, e que tamén están “a sufrir unha auténtica precaridade neste senso”, ao non dispoñer, non primeiro caso, de consulta médica cando hai unha emerxencia, e de pediatra, no segundo.

E é que, para os representantes do PSOE, a falla de facultativos nestes centros de saúde, non é máis que outra consecuencia dos continuos recortes dos Gobernos do Partido Popular. A este respecto, destaca Santín, “a falla de profesionais sanitarios e o empeoramento da calidade asistencial no sistema sanitario provincial, vén a demostrar que non faltamos á verdade cando, no seu momento, dixemos que os Orzamentos da Xunta de 2015 eran unha pantomima e unha nova burla aos cidadáns, e que marcaban a folla de ruta dun Goberno que continúa sen ter previsións para a nosa provincia”.

### **“A política reductora da Xunta”**

Por tanto, para o deputado autonómico o que está a pasar en Cospeito é consecuencia “da política reductora da Xunta”, plasmada tamén no anuncio de reducir facultativos nos concellos de menos de 2.000 habitantes. Trátase esta dunha medida que, de levarse a cabo, afectaría a un total de 24 municipios, é dicir, a 32.765 habitantes.

Deste xeito, neste recorte, a comarca máis afectada sería a da Montaña, pois 7 concellos se verían prexudicados, o que supón preto de 8.300 cidadáns. Seguiríalle A Mariña, con 7.757 veciños residentes en catro municipios; Sarria, con outros catro concellos e 5.755 habitantes; Terra Chá, con 4.969 e catro concellos; Zona Sur, con tres municipios e 4.632 cidadás e, por último, a comarca de Lugo, con preto de 3.400 veciños residentes en dous municipios. Deste xeito, as localidades nas que se eliminarían médicos serían as seguintes: Baleira, Bóveda, Cervantes, Folgoso do Courel, O Incio, Meira, Muras, Navia de Suarna, Negueira de Muñiz, As Nogais, Oural, O Páramo, Pedrafita do Cebreiro, Pobra de Brollón, Pol, Portomarín, Rábade, Ribas de Sil, Ribeira de Piquín, Riotorto, Samos, Trabada, Triacastela e O Vicedo.